

Zeich merr wie du de Deller trägst ...

Omm letzde Mittwoch iss de Schorsch bei merr gewese unn hott merr verzählt, dass er enn Daach vorher soi Fraa nooch Meenz ins Kronkehaus gebrocht hätt, ferr so e Unnersuchung, unn dass er se noochem Middach widder abgeholt hätt, ess wär nix Schlimmes, unn wenn noch enn Daach erum wär kennt moi Fraa se joo mol oorufe.

Honnes, hott de Schorsch gesaat, ich habb dess Kättche im Kronkehaus abgeliffert unn weil ich Zeit hatt bin ich nooch Meenz enoi, um was ze esse, weils joo gleich schunn halb zwölf gewese iss. Ich bin dann zu so emm Chines, weil die hawwe joo immer so Büffees, nitt deirer als siwwe Euro fuffzich, unn ferr dess Geld konnsde dich sattesse.

No ja, saach ich, dess hätt ich aach gemacht. Hott derrs dann geschmeckt?

Ja, sächter, geschmeckt hotts. Awwer beim Esse habb ich oogefonge, die Körpersprooch von Fraue ze studiern unn dess iss weit denewer gonge. Dann hotter verzählt:

Ich sitz omm Disch unn habb mich während emm Esse so e bissi umgeguckt. Unn dann habb ich festgestellt, dass jed Fraa, die sichs Esse vom Büffee abgeholt hott, ihrn Deller e bissi onnerst getraache hott. Unn dann habb ich genauer hiegeguckt unn habb merr moi Bild gemacht von dene Fraue, die efter onns Büffee gonge sinn. Weil ich mir gesaacht habb: Zeich merr wie du de Deller trägst unn ich saach dir, wer du bist.

Also doo hott so e derr Gaaß im Minirock in ooner Hond de Deller weit vor sich gehalle unn iss gelaafe, als ob se dem Deller hinnenooch renne det. Die, habb ich gedenkt, iss bestimmt e Sekretärin, die immer flitze muss, mett der iss nitt gut Kersche esse.

Dann war doo so e Dick inemme Schlabberkleid, die hott ihr vollgeladene Deller immer mett zwaa Händ unner ihrn Mordsbusen gedrickt, als wonn se ess Esse vor dene onnern Leit verstecke wolt. Die, habb ich gedenkt, die waaß dass se zu vill isst unn moont, dasses kooner merke det. Awwer sunnst werdd die gonz gemietlich soi.

Dann kam so e Mittelgroß mettere gud Figur, die hott sich beim Gehe alls umgeguckt unn hott dabei ihr Deller voll Gemies hie unn her geschwenkt, als ob se jeder zeiche wolt: Guckt, so wie ich misst ihr esse, dann seid ihr genau so schee unn so gesund wie ich. Dess iss so e Grasgriene mettem freche Maul, habb ich gedenkt.

Dann habb ich oo geseh, e Kloo innere weiß Hos unn bunt Blus, mett graue Hoorn unn villeicht sechzich, die iss mett wenich uffem Deller immer gonz vorsichdisch gonge, so als ob se Ängst hätt, mettem Esse ihr schee weiß Hos ze verkleckern. Dere Fraa habb ich immer noochgeguckt unn gedenkt, dess iss e brav Hausfraa, die dut bestimmt unner sich gucke wenn enn fremde Monn mettere babbele will. Awwer Honnes, als die dann widder vom Büffee kumme iss unn ich guck widder hie, doo kimmt die direkt uff mich zu, bleckt ihr falsche Zähne unn gauzt mich oo: Du alter Simpel, was guckst du mir ständig nach? Wenn du mich anmachen willst dann must du's anders anfangen.

Honnes, ich war so dorchonner, dass ich gestottert habb: Ich mach doch nor so ... so Studien ferr enn Fernkurs in ... in ... Zoologie. Was onnerst iss merr nitt oigefalle.

Doo sächt se: Das passt zu dir, du geiler Gockel. Unn fort war se, awwer ich hatt moi Sprooch widdergefunde unn habb ihr noochgerufe: Ich habb grad erst mett dem Kurs oogefonge unn so Sumpfhinkel wie du kumme erst im nächste Semester droo!

Awwer, moin lieber Honnes, in Zukunft werr ich mich hüte, onnern Weiwer noochzegucke unn wens nor dess iss, wie se ihrn Deller traache. Weil doodenooch konnsde se werkllich nit oischätze. Eiern Honnes